

Na osnovu člana 2. i 10. Zakona o udruženjima i fondacijama Brčko distrikta Bosne i Hercegovine ( Službeni glasnik Brčko distrikta Bosne i Hercegovine br.12/2002 ), Osnivačka skupština "IPA-Regionalnog kluba" Brčko distrikta BiH,na sjednici Skupštine održanoj dana 20.02.2014.godine donijela je:

# STATUT

## Strukovnog udruženja građana „IPA-REGIONALNI KLUB“ BRČKO DISTRIKT BOSNE I HERCEGOVINE

### GLAVA I

- **Opšte odredbe**

#### Član 1.

Odredbama ovog Statuta uređuje se: naziv i sjedište Udruženja, svojstvo i zastupanje, ciljevi, djelatnosti kojima se ostvaruju ciljevi, ostvarivanje javnosti rada Udruženja, članstvo i članarina, prava, obaveze i disciplinska odgovornost članova, organizacija i tijela Udruženja, njihov sastav, način njihova djelovanja, način odlučivanja, uslovi i način izbora i opoziva, trajanje mandata i odgovornosti članova, ostvarivanje unutarašnjeg nadzora, imovina i raspolaganje sredstvima prikupljenim od članarine i donacija, evidencije Udruženja, prestanak rada i postupak s imovinom u slučaju prestanka.

#### Član 2.

U IPA-Regionalnom klubu Brčko distrikt Bosne i Hercegovine se osigurava zajednički rad, odlučivanje i odgovornost, te ravnopravnost članova u ostvarivanju njihovih prava, dužnosti i odgovornosti utvrđenih Statutom i Zakonom bez obzira na funkciju, rang, jezik, rasu, religiju i nacionalnost.

### GLAVA II

- **Naziv i sjedište Udruženja**

#### Član 3.

- Puni naziv Udruženja IPA Regionalni klub Brčko distrikta BiH(u daljem tekstu Regionalni klub) glasi:
  - 1.Na srpskom jeziku:Струковно удруженје грађана „ИПА-Регионални клуб“ Брчко дистрикта Босне и Херцеговине (**skraćeni naziv:СУГ“ИПА-Регионални клуб“** Брчко дистрикта БиХ);
  - 2.Na bosanskom jeziku glasi: Strukovno udruženje građana,„IPA-Regionalni klub“ Brčko distrikta Bosne i Hercegovine (**skraćeni naziv:SUG“IPA-Regionalni klub“** Brčko distrikta BiH);
  - 3.Na hrvatskom jeziku glasi:Strukovna udruga građana „IPA-Regionalni klub“ Brčko distrikta Bosne i Hercegovine“ **skraćeni naziv:SUG“IPA-Regionalni klub“** Brčko distrikta BiH);
  - 4.Na engleskom jeziku glasi: Professional association of citizens,„IPA-Regional Club” of the Brcko District of Bosnia and Herzegovina (**skraćeni naziv:PAC”IPA-Regional club”** of the Brcko District of BiH).
- Sjedište Regionalnog kluba je u **Brčkom – ul.Trg mladih br.10, Brčko distrikt BiH.**
- O promjeni sjedišta Udruženja odlučuje Upravni odbor Regionalnog kluba.

#### Član 4.

Simbol Regionalnog kluba je međunarodni znak IPA-e slijedećeg opisa: u sredini se nalazi globus s označenim kontinentima crvene i morem plave boje, okružen pojasom plave boje, u kojem žutim slovima piše "INTERNATIONAL POLICE ASSOCIATION". Globus ima meridijane i paralele, u pozadini globusa nalazi se osmerokraka zvijezda žute boje, lijevo i desno se nalazi zlatni klas koji u donjem dijelu povezuje vinjeta s natpisom "SERVO PER AMIKECO", na Esperanto jeziku, što u prevodu znači „Služiti kroz prijateljstvo“.

U gornjem dijelu klasove spaja natpis IPA RK Brčko . Simbol je zaštićen međunarodnim autorskim pravom, (c) by IPA 1974.

#### Član 5.

Regionalni klub ima pečat okruglog oblika promjera 35 mm. Sačinjava ga međunarodni simbol IPA-e s natpisom "INTERNATIONAL POLICE ASSOCIATION" koji okružuje globus svijeta s osmerokrakom zvijezdom. U donjem dijelu se nalazi široka linija s natpisom "SERVO PER AMIKECO", ispod kojeg je natpis "IPA-RK" Brčko distrikt BiH.

#### Član 6.

Rad Regionalnog kluba je javan. Skupština Regionalnog kluba može odlučiti da će se sjednice odnosno rasprave u pojedinim tačkama dnevnog reda održati bez prisutnosti javnosti. Javnost rada osigurava se i ostvaruje prvobitnim i istinitim izvještavanjem članstva Regionalnog kluba putem sredstava javnog informisanja, IPA obavijesnih letaka i internih IPA glasila. Predstavnici sredstava javnog informisanja mogu prisustvovati sjednicama tijela upravljanja Udruženja i izvještavati javnost o radu tih tijela, ukoliko su zaprimili poziv za rad sjednice tijela upravljanja.

Radi što potpunijeg ostvarivanja javnosti rada, Regionalni klub može izdavati svoje glasilo u skladu s propisima o javnom informisanju. Odluku o izdavanju glasila donosi Upravni odbor Regionalnog kluba. Regionalni klub po potrebi izdaje i druga sredstva javnog informisanja (periodične publikacije, biltene, plakate i sl.) u skladu sa propisima o izdavačkoj djelatnosti.

### GLAVA III

- **Svojestvo i zastupanje**

#### Član 7.

Regionalni klub djeluje kao članica Asocijacije policajaca u Bosni i Hercegovini (IPA Sekcija Bosne i Hercegovine). Odredbe ovog Statuta usklađene su sa Statutom IPA BiH kao i međunarodnim Statutom IPA-e, i prilagođene su za područje djelovanja Udruženja s pravnim propisima Brčko distrikta BiH i Bosne i Hercegovine.

#### Član 8.

Radi uspješnijeg ostvarivanja vlastitih interesa Regionalni klub može sarađivati s drugim odgovarajućim udruženjima i organizacijama u BiH i inostranstvu, u skladu sa Zakonom.

#### Član 9.

U ostvarivanju ciljeva i zadataka utvrđenih ovim Statutom, Regionalni klub djeluje samostalno u skladu sa Zakonom. Političko djelovanje u okviru Regionalnog kluba je **STROGO** zabranjeno.

#### Član 10.

Regionalni klub je upisan u registar udruženja u Osnovnom sudu Brčko distrikta Bosne i Hercegovine.

#### Član 11.

Regionalni klub je pravno lice.

#### **Član 12.**

Djelovanje Regionalnog kluba je na području, koje prema Statutu Udruženja obuhvata Policija Brčko distrikta Bosne i Hercegovine po svojoj mjesnoj nadležnosti.

#### **Član 13.**

Regionalni klub predstavljaju i zastupaju predsjednik i sekretar Regionalnog kluba.

### **GLAVA IV**

#### **• Ciljevi i zadaci Udruženja**

#### **Član 14.**

Regionalni klub je strukovno udruženje građana u koji se slobodno i dobrovoljno učlanjuju aktivni i penzionisani pripadnici Ministarstva bezbjednosti BiH ( Policije Brčko distrikta Bosne i Hercegovine, Granične policije, SIPA-e i Ministarstva unutrašnjih poslova RS-a i F BiH-a ), bez razlike s obzirom na rang, pol, rasu, boju, jezik ili vjeroispovijest.

Svrha postojanja Regionalnog kluba je stvoriti prijateljske veze i promovisati međunarodnu saradnju. Regionalni klub je predan principima određenima Univerzalnom deklaracijom o ljudskim pravima usvojenom od Ujedinjenih nacija 1948. godine.

Ciljevi uključuju razvoj kulturnih odnosa među članovima, proširenje njihova opšteg znanja, te razmjenu stručnog iskustva. Nadalje, pokušava njegovati uzajamnu pomoć u društvenoj sferi i doprinijeti, u okviru svojih mogućnosti, mirnom suživotu među narodima i očuvanju svjetskog mira.

#### **Član 15.**

Osnovni cilj Udruženja je:

- Njegovati prijateljske odnose i međusobnu pomoć između policajaca u zemlji i inostranstvu,
- Olakšati razmjenu iskustava na policijskom području i podupirati međunarodnu policijsku saradnju,
- Sa svojim javnim djelovanjem pozitivno uticati na odnose između policajaca i građana.

Da bi ostvario svoje ciljeve, Regionalni klub preduzima slijedeće aktivnosti :

1. izmjenjuje iskustva s područja policijskog djelovanja u Bosni i Hercegovini i na međunarodnom planu u obliku savjetovanja, predavanja, seminara, kongresa, tribina i drugih stručnih skupova;
2. organizuje izvedbe studijskih i drugih putovanja u cilju stručnog povezivanja, te stručnog i profesionalnog usavršavanja članova;
3. sarađuje s drugim istovrsnim i sličnim udruženjima i organizacijama u inostranstvu i svim organizacijama koje podupiru rad Regionalnog kluba;
4. omogućuje međusobne susrete Regionalnih klubova i Sekcije s drugim Sekcijama IPA-e na međunarodnom planu;
5. zalaže se za širenje stručnih znanja putem domaćeg i stranog policijskog djelovanja;
6. izdaje stručne brošure i stručne časopise u skladu sa Zakonom;
7. organizuje društvene i sportske priredbe na nacionalnom i međudržavnom planu;
8. obavlja druge poslove koji doprinose ostvarivanju ciljeva osnivanja utvrđenih Statutom.

Regionalni klub u okvirima svoje djelatnosti brine o širenju bezbjedonosne kulture. Aktivnost Regionalnog kluba temelji se na međusobnoj toleranciji i podršci među članovima, a cjelokupna djelatnost odvija se u duhu krilatice: „SERVO PER AMIKECO“ – Služiti kroz prijateljstvo.

## Član 16.

- **Djelatnost udruženja je:**

-94.12 Djelatnosti strukovnih članskih organizacija.

## GLAVA V

- **Članovi Udruženja te prava i obaveze članova**

### Član 17.

Članom Regionalnog kluba može postati svaki pripadnik policijske organizacije u BiH, penzionisani pripadnik Policije i bivši pripadnik sa najmanje 5(pet) godina radnog staža a da nije nečasno otpušten, koji prihvata ovaj Statut i Program regionalnog kluba IPA-e. Članom Regionalnog kluba postaje se dobrovoljno pristupanjem istoj, potpisom pristupnice, te plaćanjem pristupnice i godišnje članarine. Svaki član Regionalnog kluba ima iskaznicu.

### Član 18.

Članstvo u Regionalnom klubu može biti redovno, počasno i pridruženo.

- Redovni članovi su lica iz člana 17. ovog Statuta;
- Počasnim članom postaje lice koje ima posebne zasluge za razvoj i djelovanje Regionalnog kluba. O dodjeli titule počasnog člana odlučuje Skupština Regionalnog kluba na prijedlog predsjednika Regionalnog kluba ili Upravnog odbora Regionalnog kluba. Počasnim članom može postati i svako pravno lice ili građanin, koji svojim djelovanjem pomaže u ostvarivanju ciljeva i djelatnosti Regionalnog kluba, te prihvata odredbe ovog Statuta;
- Pridruženim članom može postati svako lice iz člana 17. ovog Statuta, koje nije državljanin Bosne i Hercegovine, a koji ima stalni ili privremeni boravak u BiH. Odluku o prijemu u članstvo donosi Upravni odbor.

### Član 19.

Regionalni klub pod jednakim uslovima ima pravo koristiti opremu i sredstva IPA Sekcije Bosne i Hercegovine, kao i sve pogodnosti koje se za članove utvrđuju u okviru Sekcije.

Dužnost Regionalnog kluba je :

1. provoditi zadatke i ciljeve Sekcije;
2. poštivati pravila Sekcije i odluke tijela Sekcije;
3. suzdržavati se od aktivnosti i djelatnosti koje bi mogle štetiti ugledu i ciljevima Sekcije;
4. nadoknaditi troškove članarine u rokovima predviđenim odlukom Upravnog odbora Sekcije.

### Član 20.

Članovi Regionalnog kluba imaju neposredno i posredno izborno pravo.

- Neposredno izborno pravo ostvaruje se na sjednicama Skupštine Regionalnog kluba;
- Posredno izborno pravo ostvaruje se posredstvom izabranih predstavnika u tijelima upravljanja Regionalnog kluba.

Svaki član ima pravo nositi i koristiti simbol IPA-e u skladu s ciljevima Regionalnog Kluba i sekcije IPA Bosne i Hercegovine.

#### **Član 21.**

Članovi Regionalnog kluba imaju pravo učestvovati i odlučivati o njezinu radu, birati i biti birani u tijela Regionalnog kluba, biti izvještavani o njenom djelovanju, davati ocjene i mišljenja o radu Regionalnog kluba, davati prijedloge i postići njen rad.

Pravo je svakog člana Regionalnog kluba da učestvuje u radu seminara i predavanja koje Regionalni klub bude organizovao.

#### **Član 22.**

Članstvo u Regionalnom klubu prestaje:

1. smrću člana;
2. prestankom djelovanja Regionalnog kluba;
3. pisanom izjavom o istupanju iz članstva;
4. isključenjem iz članstva ;
5. gubitkom statusa iz člana 17. ovog Statuta.

Članovima koji se brišu iz registra ne vraća se uplaćena članarina niti novčani iznosi dati Udruženju u vidu donacija, a članovima koji se brišu iz registra oduzima se članska iskaznica i IPA značka. Član koji je isključen i brisan iz registra članova po osnovu neplaćene članarine, može ponovo postati član odmah kad uplati iznos godišnje članarine uvećane za visinu jedne članarine čiji dio ostaje Regionalnom klubu.

#### **Član 23.**

Član Regionalnog kluba može biti isključen iz članstva, ako svojim djelovanjem šteti ugledu Regionalnog kluba ili djeluje protivno odredbama Statuta, odnosno više od jedne godine ne podmiri iznos članarine.

Prijedlog za isključenje može podnijeti Upravni odbor Regionalnog kluba pisanim putem, Sudu časti Regionalnog kluba kao prvostepenom tijelu.

Na odluku Suda časti Regionalnog kluba, član ima pravo podnijeti prigovor o kojem odlučuje Skupština Regionalnog kluba.

Od trenutka pokretanja postupka do donošenja odluke, prava članstva miruju.

### **GLAVA VI**

#### **• Organizacija i tijela Udruženja**

#### **Član 24.**

Regionalni klub je Udruženje koje ima središnje tijelo, na području Jedinice policijskog tijela, koje djeluju u skladu sa ovim Statutom.

Odluku o osnivanju organizacionih oblika donosi Skupština.

#### **Član 25.**

Tijela upravljanja Regionalnog kluba su Skupština, Upravni odbor, Nadzorni odbor, Sud časti i Predsjednik kluba.

## Skupština Regionalnog kluba

### Član 26.

Skupština je najviše tijelo Regionalnog kluba. Skupštinu čine svi redovni i pridruženi članovi Regionalnog kluba. Skupština odlučuje o svim bitnim pitanjima za djelovanje Regionalnog kluba, te svim pitanjima u pogledu utvrđivanja i provođenja ciljeva i zadataka Regionalnog kluba. Skupština Regionalnog kluba saziva se po ukazanoj potrebi, najmanje jednom godišnje, a saziva je predsjednik Regionalnog kluba na osnovu odluke Upravnog odbora.

### Član 27.

Vanredna Skupština saziva se na zahtjev najmanje jedne četvrtine ukupnog broja članova ili na zahtjev Nadzornog odbora, s time da se odmah mora predložiti dnevni red. Upravni odbor je dužan sazvati Vanrednu Skupštinu u roku od trideset (30) dana od dana podnošenja zahtjeva, a ukoliko to ne učini, Vanrednu Skupštinu mogu sazvati predlagači.

Na Vanrednoj Skupštini raspravlja se samo u skladu sa predloženim dnevnim redom.

### Član 28.

Radom Skupštine rukovodi predsjednik koji dostavlja dnevni red najmanje 10 (deset) dana prije održavanja Skupštine. U slučaju spriječenosti predsjednika radom skupštine rukovodi Sekretar kluba. Skupština može pravovaljano odlučivati, ukoliko je na istoj prisutno više od polovice svih članova Regionalnog kluba. Ako na skupštini nije prisutna natpolovična većina članova Regionalnog kluba, skupština se odgađa na pola sata.

Nakon toga skupština pravovaljano odlučuje, ako je prisutna najmanje ¼ članova. Skupština odlučuje većinom glasova članova na Skupštini Regionalnog kluba. Stanje članstva utvrđuje se uvidom u evidenciju plaćanja članarine u protekloj godini.

Odluke o promjeni Statuta, Poslovnika o radu Skupštine i prestanku rada Regionalnog kluba Skupština donosi dvotrećinskom većinom prisutnih članova Skupštine.

### Član 29.

Poziv za održavanje Skupštine mora sadržavati podatke o mjestu i vremenu održavanja Skupštine, te prijedlog dnevnog reda. Uz poziv dostavljaju se i materijali o pitanjima koja su na dnevnom redu.

### Član 30.

Skupština Regionalnog kluba:

1. donosi, mijenja i dopunjuje Statut;
2. donosi, mijenja i dopunjuje Poslovnik o radu Skupštine;
3. donosi druge opšte akte potrebne za djelovanje Regionalnog kluba;
4. bira i razrješuje predsjednika Regionalnog kluba, zamjenika predsjednika Regionalnog kluba i Sekretara Regionalnog kluba;
5. bira i razrješuje članove Upravnog odbora, Nadzornog odbora te Suda časti, razmatra izvještaj o radu Sekcije;
6. odlučuje o sudjelovanju Regionalnog kluba u radu nacionalnih i inostranih organizacija te saradnji s drugim organizacijama;
7. rješava i odlučuje o prijedlozima i prigovorima članova Regionalnog kluba u drugom stepenu;
8. odlučuje o prijemu u počasno članstvo;
9. odlučuje o pripajanju drugom udruženju, razdvajanju, transformaciji, raspuštanju odnosno prestanku rada udruženja kao i o drugim statusnim promjenama.

Mandat predsjednika, zamjenika predsjednika, Sekretara, članova Upravnog odbora, Nadzornog odbora i Suda časti traje četiri godine.

#### **Član 31.**

Skupština Regionalnog kluba može opozvati i razriješiti članove Upravnog odbora, Nadzornog odbora, Suda časti i Predsjednika prije isteka vremena na koje su izabrani, ako prekorače svoja ovlaštenja ili ne izvršavaju savjesno povjerene im obaveze, te ako ne postupaju u skladu sa ovim Statutom.

Ako razrješava pojedine članove Upravnog odbora ili Predsjednika, sekretara ili blagajnika, Skupština tada bira nove članove Upravnog odbora, odnosno novog Predsjednika na vrijeme do isteka mandata u čiji su sastav birani.

Razrješava li cijeli Upravni odbor, Skupština tada bira novi do isteka mandata.

Svaki član Upravnog odbora, Nadzornog odbora, Suda časti i Predsjednik Regionalnog kluba može zatražiti svoje razrješenje prije isteka mandata na koji je izabran.

Upravni odbor

#### **Član 32.**

Upravni odbor je operativno izvršno tijelo Regionalnog kluba.

#### **Član 33.**

Upravni odbor ima sedam ( 7 ) članova. Upravni odbor čine predsjednik Upravnog odbora, sekretar, blagajnik, stalni zapisničar i tri člana Upravnog odbora.

Pri rješavanju pojedinih slučajeva u svom radu Upravni odbor poziva i druge članove Regionalnog kluba.

#### **Član 34.**

Mandat članova Upravnog odbora je četiri (4) godine s mogućnošću reizbora. Za svoj rad Upravni odbor je odgovoran Skupštini Regionalnog kluba. Svaki član Upravnog odbora može zatražiti svoje razrješenje prije isteka mandata na koji je izabran.

#### **Član 35.**

Upravni odbor Regionalnog kluba:

1. vodi rad Regionalnog kluba između dvije Skupštine;
2. utvrđuje prijedlog, izmjene i dopune Statuta;
3. donosi financijski plan i izrađuje završni račun;
4. podnosi Skupštini izvještaj o radu;
5. odlučuje o visini članarine;
6. brine se o informisanju članstva i javnosti;
7. osniva odbore, komisije i druga tijela koja pomažu ostvarivanju ciljeva Regionalnog kluba;
8. zastupa Regionalni klub na Nacionalnom i međunarodnom nivou;
9. priprema program rada i brine o njegovoj realizaciji, te predlaže provedbu istog;
10. prethodno raspravlja o određenim pitanjima iz nadležnosti Skupštine Regionalnog kluba;
11. obavlja sve druge aktivnosti koje mu Skupština stavi u nadležnost;
12. odlučuje o drugim pitanjima od značaja za rad Regionalnog kluba utvrđenim ovim Statutom koja nisu stavljena u nadležnost drugih tijela.

#### **Član 36.**

Sjednice Upravnog odbora održavaju se prema potrebi, najmanje svaka 3 mjeseca. Sjednica se može održati ako je prisutna većina članova Upravnog odbora, a pravovaljane odluke donose se većinom glasova svih članova Upravnog odbora. Sjednice Upravnog odbora vodi predsjednik Upravnog odbora. U slučaju odsutnosti predsjednika sjednicu vodi Sekretar Regionalnog kluba.

### **Član 37.**

- Predsjednik Upravnog odbora predstavlja Regionalni klub u zemlji i inostranstvu, te vodi rad Upravnog odbora. U njegovom odsustvu Regionalni klub predstavlja Sekretar ili drugi član Upravnog odbora kojeg imenuje predsjednik;
- Sekretar je na čelu sekretarijata Regionalnog kluba, čuva pečat, knjigu pošte, knjigu zapisnika Upravnog odbora i Skupštine, registar članova i druge evidencije i knjige Regionalnog kluba, osim knjiga o finansijskom stanju;
- Blagajnik se brine o finansijskim pitanjima, prikuplja novčana sredstva od članarine i donacija uz obavezu izdavanja numerisanog i ovjerenog duplikata računa, platnim nalogom ili nalogom za prenos potpisanim od strane Predsjednika i Sekretara, uplaćuje obaveze sa računa Regionalnog kluba, vodi evidencije i zapisnike koji se odnose na finansijsko stanje Regionalnog kluba. Jednom godišnje podnosi finansijski izvještaj Nadzornom odboru a na kraju finansijske godine podnosi Završni račun i daje prijedlog budžeta za narednu godinu.

Mandat Predsjednika, Sekretara i Blagajnika traje četiri (4) godine, sa mogućnošću da budu ponovo birani. Upravni odbor donosi odluke većinom glasova svih članova. U slučaju jednakog broja glasova odlučujući je glas Predsjednika Regionalnog kluba. Predsjednik Regionalnog kluba je član i predsjednik Upravnog odbora. Sekretar Regionalnog kluba brine se o informisanju članstva. Pismena akta o poslovanju potpisuju Predsjednik i Sekretar.

Nadzorni odbor

### **Član 38.**

Nadzorni odbor Regionalnog kluba čine predsjednik i dva člana, koje za razdoblje od četiri (4) godine bira Skupština Regionalnog kluba, iz redova članova Regionalnog kluba.

Za vrijeme mandata članovi Nadzornog odbora ne smiju imati drugih funkcija u Regionalnom klubu.

Nadzorni odbor je zadužen za nadzor nad novčanim sredstvima prikupljenim od članarine ili po drugim zakonitim osnovama Regionalnog kluba.

Nadzorni odbor ima pravo uvida u sve poslovne i finansijske spise Regionalnog kluba.

O izvršenom uvidu obvezno se sastavlja zapisnik, a istom prisustvuju dva (2) člana Nadzornog odbora.

O obavljenom uvidu izvještava se Upravni odbor i Skupština Regionalnog kluba.

Nadzorni odbor u hitnim slučajevima ima pravo sazvati sjednicu Upravnog odbora koja mora biti sazvana u roku od mjesec dana od postavljanja zahtjeva.

Nadzorni odbor za svoj rad odgovoran je Skupštini Regionalnog kluba.

Sud časti

### **Član 39.**

Sud časti čine predsjednik suda i dva člana Regionalnog kluba. Članovi Suda časti (u daljnjem tekstu: Sud) su izabrani od strane Skupštine Regionalnog kluba, iz redova članstva regionalnog kluba. Članovima Suda mandat traje četiri (4) godine uz mogućnost reizbora. Za vrijeme mandata članovi Suda ne smiju imati drugih funkcija u Regionalnom klubu.

Za svoj rad Sud je odgovoran Skupštini.

### **Član 40.**

Sud rješava sporove između članova kod kršenja Statuta i pravila Regionalnog kluba, neizvršavanja odluka i aktivnosti koje štete ugledu IPA-e.

U postupcima u vezi disciplinske odgovornosti članova Regionalnog kluba odgovarajući se primjenjuju odredbe Zakona o upravnom postupku Brčko distrikta BiH i drugih propisa.



#### **Član 41.**

Sud može izreći slijedeće mjere:

- opomenu;
- javnu opomenu;
- isključenje iz Regionalnog kluba.

O izrečenoj mjeri izdaje se rješenje u skladu sa odredbama Zakona o upravnom postupku Brčko distrikta BiH. Član Regionalnog kluba na kojeg je rješenje naslovljeno može na isto uložiti prigovor o kojem odlučuje Skupština Regionalnog kluba.

### **GLAVA VII.**

#### **• Materijalno i finansijsko poslovanje Udruženja**

#### **Član 42.**

Imovinu Regionalnog kluba čine prihodi koje ista ostvaruje od: članarine, dobrovoljnih priloga, poklonjenih sredstava, subvencija i drugih prihoda.

#### **Član 43.**

Regionalni klub ima svoja materijalna, osnovna i tehnička sredstva.

#### **Član 44.**

Regionalni klub upravlja imovinom u skladu sa propisima o materijalnom i finansijskom poslovanju neprofitabilnih organizacija. O svojoj imovini Regionalnog kluba vodi se evidencija. Za zakonitost finansijskog poslovanja odgovoran je blagajnik Regionalnog kluba.

#### **Član 45.**

Regionalni klub posluje putem žiro računa Regionalnog kluba pri ovlaštenoj organizaciji za obavljanje platnog prometa.

#### **Član 46.**

Financijske i materijalne liste supotpisuju predsjednik i sekretar ili lice koje je za to ovlastio Upravni odbor. Izvršenje finansijskih odluka Regionalnog kluba određuje predsjednik Regionalnog kluba, a u njegovom odsustvu zamjenik predsjednika, sekretar ili jedan ovlašten član.

#### **Član 47.**

Novčana sredstva mogu se upotrijebiti u skladu sa prihvaćenim finansijskim planom i programu rada Regionalnog kluba. Upotrebu novčanih sredstava jednom godišnje kontroliraju Nadzorni odbor. Izvještaj o završenoj poslovnoj godini - zaključni račun - plan i program proračuna za naredno razdoblje donosi Upravni odbor Regionalnog kluba.

## GLAVA VIII

- **Evidencije**

### Član 48.

Regionalni klub ima svoje evidencije, a to su:

- Registar redovnih članova, koji sadrži podatke o članovima Regionalnog kluba: ime i prezime, ime roditelja, datum i mjesto rođenja, prebivalište, zanimanje, državljanstvo (počasnih članova) i datum pristupanja;
- Knjigu zapisnika sa zasjedanja Skupštine Regionalnog kluba;
- Knjigu zapisnika sjednica Upravnog odbora;
- Knjigu finansijskog poslovanja Regionalnog kluba (sve finansijske transakcije sa računa kluba);
- Knjigu imovine Regionalnog kluba (evidencija pokretne i nepokretne imovine kluba);
- Knjigu izvještaja Nadzornog odbora;
- Knjigu predloženih i izrečenih kaznenih mjera članova Regionalnog kluba;
- Knjigu pošte (svi dolazeći i poslani dopisi).

Svi članovi Udruženja su ovlašćeni da izvrše uvid u knjige Regionalnog kluba u prisustvu lica odgovornog za njihovo vođenje.

## GLAVA IX

- **Prestanak postojanja Udruženja**

### Član 49.

Regionalni klub prestaje postojati odlukom skupštine i u slučajevima propisanim zakonom.

### Član 50.

Po prestanku postojanja Regionalnog kluba, sredstva i imovina u vlasništvu Regionalnog kluba prenamjenjuju se u humanitarne svrhe.

Odluka o tome donosi se na posljednjoj Skupštini Regionalnog kluba ili sjednici Upravnog odbora, ukoliko nije moguće sazvati Skupštinu.

## GLAVA X

- **Statut i drugi opšti akti**

### Član 51.

Statut je temeljni opšti akt Regionalnog kluba i svi drugi opšti akti moraju biti u skladu s odredbama Statuta. Nacrt izmjena i dopuna Statuta, priprema i utvrđuje Upravni odbor Regionalnog kluba i upućuje ga na raspravu članovima Skupštine.

Upravni odbor Regionalnog kluba razmatra primjedbe i prijedloge koji su dati u raspravi, zauzima stavove o njima i utvrđuje Prijedlog statuta.

### Član 52.

Tumačenje odredaba Statuta daje Skupština Regionalnog kluba.

### **Član 53.**

Sva unutrašnja pitanja Regionalnog kluba, kao i druga pitanja koja nisu uređena Statutom, a zahtijevaju potrebnu razradu, bit će uređena opštim aktima koje donosi Skupština Regionalnog kluba. Opšti akti Regionalnog kluba donose se i mijenjaju analogno postupku donošenja i izmjene Statuta, izuzev obaveze dostavljanja prijedloga opšteg akta članovima Regionalnog kluba.

## **GLAVA XI**

- **Prelazne i završne odredbe**

### **Član 54.**

Skupština Regionalnog kluba može svojom odlukom dodijeliti priznanje i nagradu pojedincima, tijelima i pravnim osobama za uspješno provođenje programa rada, ostvarivanje inovacija u području policijske struke. Isto tako u pisanom obliku predlaže pojedince, tijela i pravne osobe za godišnje nagrade IPA-e.

### **Član 55.**

Statut potpisuje imenom, prezimenom, oznakom svojstva i svojeručnim potpisom predsjedavajući osnivačke skupštine.

### **Član 56.**

Svi opšti akti donijet će se u roku od jedne (1) godine od dana upisa u registar udruženja.

### **Član 57.**

Ovaj Statut stupa na snagu s danom donošenja, a primjenjuje se s danom upisa u registar udruženja pri nadležnom Sudu.

U Brčkom 20.02.2014. godine.

**PREDSJEDAJUĆI OSNIVAČKE  
SKUPŠTINE**

---

Mustafa Ibrišimović